

Yuhannáay Saymi Kágad

Yuhannáay Saymi Kágad

© 2019 Wycliffe Bible Translators, Inc.

Gón Báibalay rajánk kanókén thimay komakká

[Creative Commons Attribution-NonCommercial-NoDerivatives 4.0 International License](#)

Yuhannáay Saymi Kágad

Drud

1 ¹ Cha kelisáay kamáshay némagá pa dordánagén Gáyusá ke pa del maná sakk dóst ent.

² Oo dordánag! Dwá kanán ke tai sajjahén kár pa sharri démá berawant o tai jesm o jáñ ham, tai ruhay paymá dráh o salámat bebit. ³ Báz gal o shádán bután ke lahtén sangat átk o gwáhiesh dát ke taw rástiay wapádár ay, bezán wati zendá rástiay sará gwázenagá ay. ⁴ Hech chizz maná cha eshiá géshter shádána nakant ke beshkonán mani chokk rástiay sará zenda gwázénant.

Brátáni madat kanag

⁵ Oo dordánag! Taw brátáni^a sajjahén kárán gón wapádáriá kanay, toré á bégánag bebant. ⁶ Áyán, báwarmandáni démá pa tai mehrá gwáhi dáttag. É sakkén sharrén káré bit ke taw áyán hamá paymá sát o saparán rawán bekanay ke Hodáay razá ent. ⁷ Chiá ke á pa hamá námaygi^b sar geptagant o cha nábáwarán^c komaké nageptagesh. ⁸ Gorhá má báyad ent choshén mardomán madat bekanén, tán má pa rástiay démá baragá hamkár bebén.

⁹ Chizzé pa kelisáyá nebeshtagon, bale Diutripis ke masteriay lóthók ent, may ehtiárá namannit. ¹⁰ Wahdé wat byáyán, áiay káráni hesáb o ketábá kanán, chiá ke may helápá drógén bohtám sheng o tálán kanagá ent. Pa inchoká ham bassa nakant, brátán wasshátka nakant o á degarán ham ke brátán wasshátka kanaga lóthant pa é kárá naylit o áyán cha kelisáyá dara kant o gallénit.

¹¹ Oo dordánag! Badiay randgiriá makan, nékiay randgiriá bekan. Harkas ke nékia kant cha Hodáay némagá ent, bale á ke badia kant Hodái nadistag. ¹² Sajjahénán, Dimitriusay bárawá sharrén gwáhi dáttag, tantaná rástiay jendá ham. Má ham hamé dhawlá gwáhia dayén o wata zánay ke may gwáhi rást o barhakk ent.

Goddhi habar

¹³ Bázén chizzé hastat ke pa taw benebeshténán, bale nalóthán gón kalam o kágadá bebant.

¹⁴ Ométwár án ke pa hamé zután tará begendán o dém pa dém gapp o trán bekanén.

¹⁵ Tará sohl o ásudagi sar bát! Dóst tará drud o drahbáta gwashant. Taw ham dóstán yak yakká pa nám, drud o drahbát sar kan.

^a1:5 “Brátay” máná har báwarmand ent, mardén o janén.

^b1:7 Bezán Issá Masihay nám.

^c1:7 Asligén Yunáni nebeshtánka gwashit: “cha darkawmán”.